



清刻龍藏佛說法變相圖

三經同卷

佛說了本生死經

佛說自誓三昧經

如來獨證自誓三昧經

良九

佛說了本生死經

良九

吳月支國優婆塞 支謙 譯

佛說是若比丘見緣起為見法已見法為見我於是賢者舍利弗謂諸比丘言諸賢者佛說若諸比丘見緣起為見法已見法為見我此謂何義是說有緣若見緣起無命非命為見法見法無命非命為見佛當隨是慧彼有二事見外緣起有二事見內緣起合為四何謂二事見外緣起為因相縛緣相縛因相縛為何等從種根從根葉從葉莖從莖節從節

懷華從華實是為因相縛何謂緣相縛為地
種水種火種風種空種從是因緣有種生彼
地為持種水為潤種火為熱種風為起種空
為令種無礙如是得時節會令種生彼種不
知我生根根不知從種有根不知我生葉葉
不知從根有葉不知我生莖莖不知從葉有
節懷華實亦不自知轉相生有又地不知我
生種種亦不知地持我水亦不知我潤種種
亦不知水潤我至火風空皆不相知是諸賢
者從因緣有得時會令種生為非自作非彼
作亦非無因生當以五事見外緣起何謂五
一非常二不斷三不跬步四種不敗亡五相
像非故彼種已壞為非常有根出為不斷種
根分異為不跬步少種多生實為不敗亡實
生如種根非故種為相像非故當知是二事

見內緣起因相縛緣相縛何謂因相縛緣不
明行緣行識緣識名色緣名色六入緣六入
更樂緣更樂痛緣痛愛緣愛緣受緣受有緣有
生緣生老死憂悲苦懣心惱如是是但大苦
性具成有彼不明不知我作行行不知從不
明有行不知我作識識不知從行有識不知
我作名色名色不知從識有六入更樂痛愛
受有生至于老死亦轉不知是從不明有行
從行有識從識有名色從名色有六入更樂
痛愛受有生老死憂悲苦懣心惱如上說是
但大苦性具成有彼若無生則無老死憂悲
苦懣心惱是諸賢者因緣起故緣是生法有
緣起不緣生法有緣生法不緣起有緣起緣
生法有不緣起不緣生法何謂緣起不緣生
法為緣不明行緣行識緣識名色至于老死

大苦性具成有如上說是謂緣起非緣生法何謂緣生法非緣起為如不明行識名色六入更樂痛愛受有生老死是謂緣生法非緣起也何謂緣起緣生法若出生住不斷老死之生是出生住因緣相近因有相近因微相近因諦相近因如相近無異相近不狂相近緣起相近以緣生如是法有受愛痛更樂六入名色識行是謂緣起緣生法何謂不緣起不緣生法謂得道者彼何謂不明為如六種六種受若女若男何謂六為地種水種火種風種空種識種良九彼身得住是為地種三如持不散是為水種飲食嘗啖卧得善消是為火種身中出息入息是為風種四大所不能持是為空種隨轉如雙箭竿是為識種如彼地種非女非男非人非士非身非人所非人生非

少年非作無作者非住無住者非智無智者非衆生非吾非我非彼有無有主水火風空種亦如是識種非女非男非人非士非身非身所非人生非少年非作無作者非住無住者非智無智者非衆生非吾非我非我有無有主如是但從六種為一想為合想為女想為男想為淨想為身想為自在想為強自在作受若干種故為不明時說曰性癡淨常想樂想身想疑嫌妄非上要佛說是不明亦為染於物無慧生妄故為不明妄故為行知物故為識五性故為名色倚名色根故為六入三會故為更樂更樂行故為痛痛而樂故為愛愛彌廣故為受受當復有行故為有五性具成故為生諸種熟故為老命根繫閉故為死熱中為憂狂語為悲臨五識身合為五苦

心識身合為懣心念勞為惱有故生有如是見知彰顯是說具懣大苦性足從是受凶衰著故復生其始不可見知不可度量又冥為不明義作成爲行義知爲識義緣住彼彼相倚為名色義住亦不專為六入義更亦合會為更樂義從知為痛義渴欲得物如火無厭為愛義取為受義當復有為有義五性仰為生義熟為老義行虧為死義如是義說亦為十二緣起相又從不明近福德行作近罪賊行作是謂緣不明行有諸行故近福不福而有識是謂緣良九行識由識作性行名色具成生是謂緣識名色是緣生作作輒受是謂緣名色六入眼識會更樂是謂緣六入更樂如更樂痛知亦爾是謂緣更樂痛死不知痛者為行別故從愛像轉取是謂緣痛愛從愛像更

吞是謂緣愛受有受為三行身口意是謂緣受有有行勞當復有具成生是謂緣有生五性已成故有老死是為十二緣起隨轉宛轉造作田業識造種行不明造對行如地持種水令種不散火令種熟風令種起空令種無礙行造田業亦如是愛造潤行彼行不知我造田業愛不知我為潤行識不知我為種行不明不知我為對行如地不知我持種水火風空如上說從有行勞當復有具成生此亦無有從是世跬步者但因緣相持譬如鏡淨明朗緣內外生面像面亦不死此生彼鏡中從有面因緣不虧是不死此而生彼為有苦情因緣不虧從是有受如火以受不斷現晝夜然其炎不步識亦如是不身相縛往來五道有緣故生是法無主譬如月圓四十九由

延而圓形現於下水有緣不虧非月死彼而
於此生觀生死當如是是為因相縛何謂緣
相縛如佛告阿難眼緣色生眼識彼眼不知
我作倚行色不知我為識對明不知我為識
照空不知我今識無礙識不知我生此作有
眼色明空念令眼識具成生耳鼻口身心緣
法生心識彼眼不知我為識作倚行法不知
我為識作行心不知我為識作明空不知我
今識無礙識不知我成此因緣是阿難緣心
法明空念令心識具成生而此非自作非彼
作非兩作非無因生非我故非彼故非無因
有當以五事見內緣起何謂五非常不斷不
步少行多報相像非故彼如死際身已壞為
非常出生有身分為不斷或同去或異去分
異故為不步少行多報報謂行不敗亡如行

報生非故像也若見此緣起無命非命為見
法見法無命非命為見四諦苦集盡道譬如
明人見師成畫歎其畫好師妙見四諦者亦
如是佛一切知一切見從是得喜不離佛得
法眾至真戒喜不離

佛說了本生死經